



80-34



6

北史卷三十

唐

李

延

壽

撰

列傳第十八

盧玄

玄孫思道
昌衡元明

潛

盧柔

子愷

盧觀

弟仲宣
從子文偉

叔彪

盧同

子斐
光

兄子景裕
光子賁

景裕弟辯
光從弟勇

盧誕

盧玄字子真范陽涿人也曾祖湛晉司空劉琨從事中郎祖偃父邈並仕慕容氏偃爲營丘太守邈爲范

陽太守皆以儒雅稱神麴四年太武辟召天下儒儒以玄爲首授中書博士遷侍郎本州大中正使馮弘

稱臣請附外兄司徒崔浩每與言輒歎曰對子真使我懷古之情更深浩大欲齊整人倫分明姓族玄曰

創制立事各有其時樂爲此者詎幾人也宜三思浩當時雖無以異之竟於不納浩敗頗亦由此後賜爵

固安子散騎常侍使宋宋文帝與之言嘉歎良久曰中郎卿曾祖也還過疾歸鄉卒贈平東將軍幽州刺

史固安侯諡曰宣子度世字子遷幼聰達有計數爲中書學生應選東宮弱冠與從兄遐俱以學行爲時

流所重遐特爲崔浩所敬位至尙書光祿大夫范陽子度世後以崔浩事棄官逃於高陽鄭罷家罷匿之

使者囚罷長子將加捶楚罷誠之曰君子殺身以成仁汝雖死勿言子奉父命遂被拷掠乃至火熱其體

因以物故卒無所言度世後令弟娶嬖妹以報其恩大武臨江宋文使其殿上將軍黃延年至帝問曰盧度世坐與崔浩親通逃命江表應已至彼延年對曰都下無聞當必不至帝詔東宮赦度世宗族逃亡籍沒者度世乃出拜中書侍郎襲爵興安初兼太常卿立保太后父遼西獻王廟進爵爲侯後除散騎侍郎使宋應對宋侍中柳元景失衷還被禁劾經年乃釋除濟州刺史州接邊境將士數相侵掠度世乃禁勒所統還其俘虜二境以寧後坐事免尋除青州刺史未拜卒諡曰惠四子伯源敏昶尙之初玄有五子唯度世嫡餘皆別生崔浩之難其庶兄弟桓欲害之度世常深忿恨及度世有子每誠絕妾孽以防後患至伯源兄弟婢妾生子雖形貌相類皆不舉接爲識者所非伯源小名陽烏性溫雅寡欲有祖父風敦尙學業闔門和睦襲侯爵降爲伯累加祕書監本州大中正時孝文帝將立馮后先問伯源請更簡卜帝曰以先后之姪朕意已定伯源曰雖奉勅如此然臣心實有未盡及朝臣集議執意如前馮誕有盛寵深以爲恨伯源不以介懷及孝文議伐齊伯源表以爲萬乘親戎轉運難繼詔雖不從而優答之尋以齊武帝殂停師時涇州羌叛殘破城邑伯源以步騎六千號三萬徐行而進未經三旬賊衆逃散降者數萬口唯梟首惡餘悉不問詔兼侍中初伯源年十四嘗詣長安將還餞送者五十餘人別於渭北有相者扶風人王達曰諸君皆不如此盧郎雖位不副實然得聲名甚盛望踰公輔後二十餘不當制命關右願不相忘此

行也相者年過八十詣軍門請見言敘平生未幾守儀曹尙書及齊雍州刺史曹武請降乃以伯源爲使持節安南將軍督前鋒諸軍徑赴樊鄧辭以儒生不行軍事帝不許伯源曰臣恐曹武爲周訪耳陛下宜審之武果僞降伯源乃進攻赭陽師敗坐免官爵尋遭母憂服闋兼太尉長史後爲徐州京兆王愉兼長史愉時年少事無巨細多決於伯源伯源以誠信御物甚得東南人和南徐州刺史沈陵密謀叛伯源屢有表聞朝廷不納陵果逃叛陵之餘黨伯源皆撫而赦之唯歸罪於陵由是衆心乃安景明初卒於祕書監年四十八贈幽州刺史復本爵固安伯諡曰懿初湛父志法鍾繇書子孫傳業累世有能名至邈以上兼善草跡伯源習家法代京宮殿多其所題白馬公崔宏亦善書世傳衛瓘體魏初工書者崔盧二門伯源與李冲特相友善冲重伯源門風伯源私冲才官故結爲婚姻往來親密至於伯源荷孝文意遇頗亦由冲伯源有八子長子道將字祖業應襲父爵而讓第八弟道舒詔不許道將引清河王國常侍韓子熙讓弟采魯陽男之例詔乃許之道將涉獵經史風氣謬諤頗有文才爲一家後來之冠諸父並敬憚之彭城王勰任城王澄皆虛衿相待勰爲中軍大將軍辟行參軍累遷燕郡太守道將下車表樂毅霍原之墓爲之立祠優禮儒生厲勸學業敦課農桑墾田歲倍卒於司徒司馬贈太常卿諡曰獻所爲文筆數十篇子懷祖太學博士員外散騎侍郎卒子莊少有美名位都水使者卒官懷祖弟懷仁字子友涉學有辭性

恬靜蕭然有閑雅致歷太尉記室弘農郡守不之任卜居陳留界所著詩賦銘頌二萬餘言撰中表實錄二十卷懷仁有行檢善與人交與琅邪王衍隴西李壽之情好相得常語衍云昔太丘道廣許劭知而不顧嵇生峭立鍾會遇而絕言吾處季孟之間去其太甚衍以爲然子彥卿有學尙仕隋位御史撰後魏紀三十卷貞觀中位石門令東宮學士道將弟道亮字仲業隱居不仕子思道

思道字子行聰爽俊辯通悅不羈年十六中山劉松爲人作碑銘以示思道思道讀之多所不解乃感激讀書師事河間邢子才後復爲文示松松不能甚解乃喟然歎曰學之有益豈徒然哉因就魏收借異書數年間才學兼著然不持操行好輕侮人物齊天保中魏史成思道多所非毀由是前後再被笞辱因而落泊不調後左僕射楊遵彥薦之於朝解褐司空行參軍長兼員外散騎侍郎直中書省文宣帝崩當朝文士各作挽歌十首擇其善者而用之魏收陽休之祖孝徵等不過得一二首唯思道獨有八篇故時人稱爲八米盧郎後漏泄省中語出爲丞相西閤祭酒歷太子舍人司徒錄事參軍每居官多被譴辱後以擅用庫錢免歸家嘗於薊北悵然感慨爲五言詩見意世以爲工後爲給事黃門侍郎待詔文林館周武帝平齊授儀同三司追赴長安與同輩陽休之等數人作聽蟬鳴篇思道所爲詞意清切爲時人所重新野庾信徧覽諸同作者而深歎美之未幾母疾還鄉遇同郡祖英伯及從兄昌期等舉兵作亂思道預爲

柱國宇文神舉討平之思道罪當斬已在死中神舉素聞其名引出令作露布援筆立成文不加點神舉嘉而有之後除掌教上士隋文帝爲丞相遷武陽太守位下不得志爲孤鴻賦以寄其情其序曰余志學之歲自鄉里遊京師便見識知音歷受羣公之眷年登弱冠甫就朝列談者過誤遂竊虛名通人楊令君邢特進以下皆分庭致敬倒屣相接翦拂吹噓長其光價而才本鶻拙性實疎嬾勢力貧殖淡然不營雖寵絆朝市且三十載而獨往之心未始去懷抱也攝生外和有少氣疾分符坐嘯作守東原洪河之湄沃野彌望囂務旣屏魚鳥爲隣有離羣之鴻爲羅者所獲野人馴養貢之於余置諸池庭朝夕賞翫旣用銷憂兼以輕疾大易稱鴻漸於陸羽儀盛也揚子曰鴻飛冥冥騫翥高也淮南子云東歸碣石遠溽暑也平子賦南翔衡陽避祁寒也若其雅步清音遠心高韻鵷鷺已降罕見其儔而鍛翮墻陰偶影獨立唼喋糝稗雞鷺爲伍不亦傷乎余五十之年忽焉已至永言身事慨然多緒乃爲之賦聊以自慰云開皇初以母老表請解職優詔許之思道恃才地多所陵轢由是官途淪滯旣而又著勞生論指切當世歲餘奉詔郊勞陳使頃之遭母憂未幾起爲散騎侍郎參內史侍郎事于時議置六卿將除大理思道上奏曰省有駕部寺留太僕省有刑部寺除大理斯則重畜產而賤刑名誠爲不可又陳殿庭非杖罰之所朝臣犯笞罪請以贖論上悉嘉納之是歲卒于京師上甚惜之遣使弔祭焉集二十卷行於世子赤松大業中位河東

縣長道亮弟道裕字寧祖少以學尙知名風儀兼美尙獻文女樂浪長公主拜駙馬都尉歷位中書侍郎太子中庶子幽州大中正卒於涇州刺史諡曰文道裕弟道虔字慶祖粗閑經史兼通算術尙孝文女濟南長公主拜駙馬都尉公主驕淫聲穢遐邇無疾暴薨時云道虔所害宣武祕其事不苦窮之後靈太后追主薨事黜道虔令終身不仕道虔外生李或尙莊帝姊豐亭公主因相藉託永安中除輔國將軍通直常侍以議厯勳賜爵臨淄伯天平中厯都官尙書本州大中正幽州刺史加衛大將軍卒官贈尙書右僕射司空公瀛州刺史諡曰文恭道虔好禮學難齊尙書令王儉喪服集記七十餘條爲尙書同寮於草屋下設鷄黍之膳談者以爲高昧旦將上省必見其弟然後去奴在馬上彈琵琶道虔聞之杖奴一百公主二子昌寓昌仁昌寓不慧昌仁早卒道虔又娶司馬氏有子昌裕後司馬氏見出更嬙元氏甚聰悟常升高座講老子道虔從弟元明隔紗幃以聽焉元氏生二子昌期昌衡昌衡最知名

昌衡字子均小字龍子沉靖有才識風神澹雅容止可法博涉經史工草行書從弟思道小字釋奴宗中稱英妙昌衡與之俱被推重故幽州語曰盧家千里釋奴龍子仕魏兼太尉外兵參軍齊受禪歷平恩令右僕射祖孝徵薦爲尙書金部郎孝徵每曰吾用盧子均爲尙書郎自謂無愧幽明始天保中尙書王昕以雅談獲罪諸弟尙守而不墜自茲以後此道浸微昌衡與頓丘李若彭城劉珉河南陸彥師隴西辛德

源王猶並爲後進風流之士後兼散騎侍郎迎勞周使周武平齊授司玉士與大宗伯斛斯微修禮令隋開皇初拜尙書祠部侍郎文帝嘗大集羣下令自陳功人皆競進昌衡獨無所言左僕射高潁目而異之陳使賀徹周濟相繼來聘朝廷每令昌衡接對之未幾出爲徐州總管長史甚有能名吏部尙書蘇威考之曰德爲世表行爲士則論之者以爲美談常行至浚儀所乘馬爲人牛所觸致死牛主陳謝求還價直昌衡謂曰六畜相觸自關常理此豈人情也君何謝焉拒而不受性寬厚不校皆此類也轉壽州總管長史宇文述甚敬之委以州務歲餘遷金州刺史仁壽中奉詔持節爲河南道巡省大使及還以奉使稱旨授儀同三司賜物二百段昌衡自以年在縣車上表乞骸骨優詔不許大業初徵爲太子左庶子行詣洛陽道卒子寶素寶盾道虔弟道侃字希祖沉雅有學尙位州主簿卒以弟道約子正達爲後道侃弟道和字叔雍兄弟之中人望最下位冀州中軍府中兵參軍卒子景猷弘農太守景猷子士彥有風采隋開皇中爲蜀王秀屬以秀所爲不軌辭疾終於家道和弟道約字季恭位司徒屬幽州大中正興和末除衛大將軍兗州刺史在州頗得人和卒贈儀同三司幽州刺史子正通少有令譽位開府諮議卒妻謝氏與正通弟正思淫亂爲御史所劾人士疾之正思弟正山字公順早以文學見知爲符璽郎待詔文林館正思兄弟以齊太后舅氏武平中並得優贈道約弟道舒字幼安襲父爵位中書侍郎卒子熙裕清虛守道

有古人風襲熙裕爲親表所敬伯源弟敏字仲通小字洪崖少有大量孝文器之納其女爲嬪位儀曹郎
早卒贈威遠將軍范陽太守諡曰靖五子長義儻字遠慶早有學尚識度沈雅年九歲喪父便有至性少
爲僕射李冲所歎美起家祕書郎累遷冠軍將軍中散大夫以母憂去職幽州刺史王誦與之交款每與
故舊李神儻等書曰盧冠軍在此時復惠存輒連數日得以諮詢政道其見重若此後拜征虜將軍太中
大夫散秩多年澹然自得李神儻勸其干謁當途義儻曰旣學先王之道貴行先王之志何得苟求富貴
也孝昌中除散騎常侍時靈太后臨朝黃門侍郎李神軌勢傾朝野求結婚姻義儻慮其必敗拒而不許
王誦謂義儻曰昔人不以一女易五男卿易之也義儻曰所以不從正謂此耳從恐禍大而連速誦乃握
義儻手曰我聞有命不敢以告人遂適他族臨婚之夕靈太后遣中常侍服景就家勅停內外惶怖義儻
夷然自若普泰中除都官尚書驃騎大將軍左光祿大夫義儻寬和畏慎不妄交款性清儉不營財利少
時幽州頻遭水旱先有數萬石穀貸人義儻以年穀不熟乃燭其契州閭悅其恩德雖居顯位每至困乏
麥飯蔬食怡然甘之卒贈大將軍儀同三司瀛州刺史諡曰孝簡子遜之清靖寡欲位太尉記室參軍義
儻四弟並遠不逮兄也

敏弟昶字叔達小字師顏學涉經史早有時譽太和中兼員外散騎常侍使於齊孝文詔昶曰密邇江揚

不早當晚會是朕物卿等欲言便言無相疑難又勅副使王漬石曰卿莫以南人語致疑盧昶若彼先有知識欲見但見須論卽論昶正寬柔君子無多文才或主客命卿作詩莫以昶不作便罷也凡使人以和爲貴勿相矜夸見於色貌及至彼遇齊明立孝文南討昶兄伯源爲別道將而齊明以朝廷加兵遂酷遇之昶等本非骨鯁大怖淚汗橫流齊明以腐米臭魚莖豆供之而謁者張思寧辭氣褻憊遂以壯烈死於館中昶還孝文責之曰銜命之禮有死無辱雖流放海隅猶宜抱節致殞卿不能長纓羈首已是可恨乃俛眉飲啄自同犬馬有生必死修短幾何卿若殺身成名貽之竹素何如甘彼芻菽以辱君父縱不能達慙蘇武寧不近愧思寧遂見罷黜景明初除中書侍郎遷給事黃門侍郎本州大中正散騎常侍兼尙書時洛陽縣獲白鼠昶奏以爲案瑞典外鎮刺史二千石令長不祇上命刻暴百姓怨嗟則白鼠至因陳時政多所勸誡詔書褒美其意轉侍中又兼吏部尙書尋卽正仍侍中昶守職而已無所激揚與侍中元暉等更相朋附爲宣武所寵時人鄙之出爲徐州刺史昶旣儒生本少將略又羊社子變爲昶司馬專任戎事掩昶耳目將士怨之胸山戍主傅文驥糧樵俱罄以城降梁昶見城降先走退諸軍相尋奔遁遇大寒軍人凍死及落手足者太半自魏經略江右唯中山王英敗於鍾離昶於胸山失利最爲甚焉宣武遣黃門甄琛馳驛鎖昶窮其敗狀詔以免官論月餘將統以下悉聽依赦復任未幾拜太常卿仍除雍州刺史

進號鎮西將軍加散騎常侍卒官諡曰穆昶寬和矜恕善於綏懷其在徐州戍兵有疾親自檢恤至番兵年滿不歸容充後役終昶一政然後始還人庶稱之

子元聿字仲訓無他才能尙孝文女義陽長公主拜駙馬都尉位太尉司馬光祿大夫卒贈中書監子士晟儀同開府掾元聿第五弟元明字幼章涉歷羣書兼有文義風彩閑潤進退可觀永安初長兼尙書令臨淮王彧欽愛之及彧開府引爲兼屬仍領部曲孝武登阼以郎任行禮封城陽縣子遷中書侍郎永熙末居洛東緱山乃作幽居賦焉於時元明友人王由居潁川忽夢由攜酒就之言別賦詩爲贈及明憶其詩十字云自茲一去後市朝不復遊元明歎曰由性不狎俗旅寄人間乃有今夢詩復如此必有他故經三日果聞由爲亂兵所害尋其亡日卽是發夢之夜天平中兼吏部郎中副李諧使梁南人稱之還拜尙書右丞相轉散騎常侍監起居積年在史館了不措意又兼黃門郎本州大中正元明善自標置不妄交遊飲酒賦詩遇興忘返性好玄理作史子雜論數十篇諸文別有集錄少時常從鄉還洛途遇相州刺史中山王熙熙博識之士見而歎曰盧郎有如此風神唯須誦離騷飲美酒自爲佳器遂留之數日贈帛及馬而別元明凡三娶次妻鄭氏與元明兄子士啟淫汙元明不能離絕又好以世地自矜時論以此貶之元明弟元緝字幼緒兇醜好酒曾於婦氏飲宴小有不平手刃其客位輔國將軍司徒司馬贈驃騎大將

軍吏部尙書幽州刺史諡曰宣昶弟尙之字季儒小字羨夏亦以儒素見重位司徒左長史前將軍濟州刺史光祿大夫長子文甫字元祐涉歷文史有名譽於時位司空行參軍文甫弟文翼字仲祐少甚輕躁晚頗改節以軍功賜爵范陽子位太中大夫文翼弟文符字叔偉性通率位通直散騎侍郎子潛潛容貌瓌偉善言談少有人志尙累遷大將軍府中兵參軍機事強濟爲文襄所知曾其終可大用王思政見獲於潁川文襄重其才識潛常從容白文襄思政不能死節何足可重文襄計左右曰我有盧潛便是更得一王思政天保中除左戶郎中坐譏議魏書與王松年李庶等俱被禁止會清河王岳救江陵特赦潛爲岳行臺郎還歷中書黃門侍郎爲奴誣告謀反文宣明之以奴付潛潛不之責黃門鄭子默奏潛從清河王岳南討岳令潛說梁將侯瑱大納瑱賂還還奏聞文宣杖潛一百仍截其鬚潛顏色不變歷魏尹丞司州別駕江州刺史所在有善政孝昭作相以潛爲揚州道行臺左丞先是梁將王琳擁其主蕭莊歸壽陽朝廷以琳爲揚州刺史勅潛與琳爲南討經略後除行臺尙書儀同三司王琳銳意圖南潛以爲時事未可由是與琳有隙更相表列武成追琳入鄴除潛揚州刺史領行臺尙書潛淮南十三年大樹風績爲陳人所憚陳主與其邊將書云盧潛猶在卿宜深備之文宣初平淮南給復十年年滿後逮天統武平中徵稅頗雜又高元海執政斷漁獵人家無以自資諸商胡貢官責息者宦者陳德信縱其妄注淮南

富家令州縣徵責又勅送突厥馬數千匹於揚州管內令土豪貴買之錢直始入便出勅括江淮間馬並送官廐由是百姓騷擾切齒嗟怨潛隨事撫慰兼行權略故得寧靖武平三年徵爲五兵尙書揚州吏人以潛斷酒肉篤信釋氏大設僧會以香花緣道流涕送之潛歎曰正恐不久復來耳至鄴未幾復爲揚州道行臺尙書四年陳將吳明徹來寇領軍封輔相赴援陳兵及峴輔相不從潛固爭不得憂情發病臥幕下果敗陳人遂圍壽陽壅芍陂以水灌之詔王長春爲南討都督長春軍次河南多給兵士糧便鳴角欲引而賤糴其米及頓兵更貴糴其米乃之虔景和擁衆十萬於淮北不進壽陽城中青黑龍升天城尋陷潛及行臺僕射王貴顯特進巴陵王王琳扶風王可朱渾孝裕武衛將軍奚永樂儀同索景和仁州刺史酈伯偉霍州刺史封子繡泰州刺史高子植行臺左丞李嗣餘等督將五十八軍士一萬皆沒焉陳人殺王琳餘皆囚於東冶陳主欲知齊之虛實乃出潛曰囚本屬幽州於河北最小口有五十萬落陳者唯與酈伯偉二人耳時李嗣餘將逃歸并要潛潛曰我此頭面何可誑人吾少時相者云沒在吳越地死生已定弟其行也因寄書與弟士邃曰吾夢汝以某月某日得患某月某日漸損皆如其言旣而歎曰壽陽陷吾以頸血濺城而死佛教不聽自殺故挂蓐偷生今可死矣於是閉氣而絕其家購屍歸葬贈開府儀同三司尙書左僕射兖州刺史無子以弟士邃子元孝嗣潛雅性貞固祖珽常要潛陷仁州刺史劉逖許以

高位潛曰如此事吾不爲也行臺慕容恃德常所推重有疾謂其子曰盧尙書教我爲人有如昆弟我死持上駢馬與之其子以他馬往恃德柩出門自停不可動巫祝以爲恃德聲怒曰何不與盧尙書我所騎駢馬其子遽奉命柩乃行潛以馬價爲營福事其爲時重如此士遽字子淹少爲崔昂所知昂云此昆季足爲後生之倭但恨其俱不讀書耳位尙書左右丞吏部郎中中山太守帶定州長史齊亡後卒度世之爲濟州也魏初平升城無鹽房崇吉母傳度世繼外祖母兄之子婦也兗州刺史申纂妻賈氏崇吉之姑女也皆亡被老病憔悴而度世推計中表致其供恤每覲見傳氏跪問起居隨時奉送衣被食物亦存賑賈氏供其服膳青州旣陷諸崔墜落多所收贖及伯源昶等並循父風遠親疎屬叙爲尊行長耆莫不畢拜致敬闔門之禮爲世所推謙退簡約不與世競父母亡後同居共財自祖至孫家內百口在洛時有饑年無以自贍然尊卑怡穆豐儉同之親從昆季常旦省諸父出坐別室暮乃入內朝府之外不妄交遊其相勗以禮如此又一門二主當世以爲榮伯源兄弟亡及道將卒後家風衰損子孫多有非法幃簿混穢爲時所鄙度世從祖弟神寶位中書博士孝文爲弟高陽王雍納其女爲妃初立從祖兄溥慕容寶之末統攝鄉部屯海濱殺其鄉姻諸祖十餘人稱征北大將軍幽州刺史攻掠郡縣天興中討禽之溥立孫洪字曾孫太和中位中書博士樂陵陽平二郡太守幽州中正洪三子長子崇少立美名有識者許之以遠

大卒於驃騎府曹參軍崇子柔

柔字子剛少孤爲叔母所養撫視甚於其子柔盡心溫清亦同己親親族歎重之性聰敏好學未冠解屬文但口吃不能持論頗使酒誕節爲世所譏司徒臨淮王彧見而器之以女妻焉及魏孝武與齊神武有隙詔賀拔勝出牧荊州柔謂因此可著功績遂從勝之荊州以柔爲大行臺郎中掌書記軍之機務柔多預之及勝爲太保以柔爲掾孝武後召勝引兵赴洛勝以問柔柔曰高歡託晉陽之甲意實難知公宜席卷赴都與決勝負存沒以之此忠之上策也若北阻魯陽南并舊楚東連兗豫西接關中帶甲十萬觀釁而動亦中策也舉三荆之地通欵梁國可以庇身功名去矣策之下者勝輕柔年少笑而不應及孝武西遷東魏遣侯景襲纓勝敗遂南奔梁柔亦從之勝頻表梁武帝求歸關中梁武帝覽表嘉其辭彩既知柔所製因遣舍人勞問并遺繡錦後與勝俱還行至襄陽齊神武懼勝西入遣侯景以輕騎邀之勝及柔懼乃棄船山行羸糧冒險經數百里時屬秋霖徒侶凍餒者大半至於死大統二年至長安封容城縣男周文帝引爲行臺郎中除從事中郎與郎中蘇綽掌機密時沙苑之役大軍屢捷汝潁之間多舉義來附齊翰往反日百餘牒柔隨機報答皆合事宜進爵爲子累遷中書侍郎兼著作撰起居注後爲黃門侍郎周文知其貧解衣賜之後遷中書監周孝閔帝踐阼拜小內史大夫進位開府儀同三司卒於位所作詩頌

碑銘檄表啟行於世者數十篇子愷嗣

愷字長仁性孝友神清穎悟涉獵經史有當世執能頗解屬文周齊王憲引爲記室從憲伐齊說齊相社鎮下之遷小吏部大夫時染工王神歡者以賂自進冢宰宇文護擢爲計部下大夫愷諫曰古者登高能賦可爲大夫求賢審官理須詳慎今神歡出自染工更無殊異徒以家富自通遂與縉紳並列實恐鷄翼之刺聞之外境護竟寢其事轉內史下大夫武帝在雲陽宮勅諸屯簡老牛欲以享士愷諫曰昔田子方贖老馬君子以爲美談向奉明勅欲以老牛享士有虧仁政帝美其言而止轉禮部大夫爲聘陳使副先是行人多行其國禮及愷爲使一依本朝陳人莫能屈建德四年李穆攻拔軹關柏崖二鎮命愷作露布帝讀大悅曰盧愷文章大進荀景倩故是令君之子大象元年拜東都吏部大夫隋開皇初加上儀同三司除尚書吏部侍郎進爵爲侯仍攝尚書左丞每有敷奏侃然正色雖逢喜怒不改其常加散騎常侍八月上親考百寮以愷爲上固讓不敢受文帝曰當仁不讓何愧之有皆在朕心無勞節讓歲餘拜禮部尚書攝吏部尚書事會國子博士何妥與右僕射蘇威不平奏威陰事愷坐與相連憲司奏愷曰房恭懿者尉遲迥之黨不當仕進威愷一人曲相薦達累轉海州刺史吏部預選者甚多愷不卽授官皆注色而遣威之從父弟徹肅二人並以鄉正徵諸吏部徹文狀後至而先任用肅左足攣蹇才用無算愷以威故授

朝請郎愷之朋黨事甚明白上大怒曰愷敢將天官以爲私惠愷免冠頓首曰皇太子將以通事舍人蘇夔爲舍人夔威之子臣以夔未當遷固敢而止臣若與威有私豈當如此上曰威子朝廷共知卿乃固執以徼身幸至所不知便行朋附姦臣之行也於是除名卒於家自周氏以降選無清濁及愷攝吏部與薛道衡陸彥師等甄別士流故涉黨固之譖遂及於此崇弟仲義字小黑知名於世位員外散騎侍郎幽州刺史崇兄弟官雖不達婚姻常與玄家齊等洪弟光宗位尙書郎光宗子觀

觀字伯舉少好學有儒才舉秀才射策甲科除太學博士著作佐郎與太常少卿李神儻光祿大夫王誦等在尙書上省撰定朝儀遷尙書儀曹郎中孝昌元年卒

觀弟仲宣小名金才學優洽乃踰於觀但文體頗細兄弟俱以文章顯論者美之位太尉屬魏孝莊帝初遇害河陰乃兄觀並無子文集莫爲撰次罕有存者仲宣弟叔彪

叔彪少機悟豪率輕俠好奇策慕諸葛亮之爲人爲賀拔勝荊州開府長史勝不用其計棄城奔梁叔彪歸本縣築室臨陂優遊自適齊文襄降辟書辭疾不到天保初復徵不得已布裙露車至鄴楊愔往候之以爲司徒諮議辭疾不受孝昭卽位召爲中庶子問以世事叔彪勸討關西畫地陳兵勢請立重鎮於平陽與彼痛州相對深溝高壘運糧實之帝深納之又願自居平陽成此謀略帝命元文遙與叔彪參謀撰